



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail: tiryimym@gmail.com

TAPAK 8

Yangia anidakangma :



Tir Yimym



tir_yimym



tir yimym

TAPAK 7

Küm 24 asayaba sülen Milner asaya nungi anisüngzüker

French Open: Kostyuk-i Swiatek tsükdaktsüogo



VOL. XXIII ISSUE NO. 229 (ADOK 229) DIMAPUR SANGTENNÜ (TUESDAY) AAMI (JUNE) 02, 2026

₹ 5.00

DMR aser Cmu nung 'speed limits' latettsür

Dimapur, June 1, 2026 (TYO): Commissioner of Police (CP), Dimapur-er Dimapur aser Chümoukedima temeket nung speed limits tasen metetdaktüsügo.

CP-isa Dimapur aser Chümoukedima nung national highways nung gari tulutem anena mayutsü tenokdangba agütsüogo.

Zion Hospital Junction aser Chümoukedima tsüingda NH-29 nung 50 kmph, Dimapur city limits telongtet nung 30 kmph aser Patkai-Seithekema area nung Kushiabill nungi Chathe Bridge tashi 80 kmph speed limit tasen latetba metetdaktüsügo.

Supreme Court-i latettsüba ama designated parking bays, lay-bys mesüra wayside amenities dak alaka national highways nung gari tulutem, trucks mesüra commercial vehicles anena mayutsü tenokdangba agütsür ta Commissioner of Police (CP)-isa ashi.

Item garitem raksaba mesüra emergency atema anena ayuba süra hazard lights aser reflective warning triangles ayutsüla ta CP Dimapur-isa metetdaktüsügo.

Tashi mangartem Motor Vehicles Act aser Bharatiya Nyaya Sanhita (BNS) kübok temerenshi alitsü.

NMA-i O. Watimeren Jamir aitsür

Dimapur, June 1, 2026 (TYO): Dimapur nung student activist nungi lawyer akümer O. Watimeren Jamir-i tanur tetsür ka dak tashiyim inyakba khukhua aitsür ta Naga Mothers' Association (NMA)-i metetdaktüsügo.

Tanütsüla asoshi tekümsüker ka ta asür kati kidang yamai tesempatsü mapa inyakba atema kanga nüma matanger. Iba tatalokba ya jungjunga bushisüngdang asütsüla aser ozüing tapet kübok temerenshi agütsütsüla ta NMA-i sangdong ka nung ashi.

Onoki tanutsüla atema temeten meshir aser tetsür ajak dang asen jalatem dak ibala tashiyim mapa inyakba anema noktaksü ayongzüker ta NMA President Vilanuo Angela Yhome-i sangdong nung ashi.

Onoki tanutsüla asr lar kibong dang temeten bushiba nung akokba tashi yaritsü nangzüker. Maneni tanutsüla indang right to privacy nenshir aser state sorkar dang la kümzüka ayutsü, rehabilitation aser counseling asoshi temulung agütsütsü ayongzüker ta NMA-isa metetdaktüsügo.

JTCM-i Zeliangrongpui region ajunga mokdang

Imphal, June 1, 2026 (Agencies): Joint Tribes' Council Manipur (JTCM) ajanga Zeliangrong region ajungalen 'emergency shutdown' aliba metetdaktüsügo.

May 13 nü Naga civilians trok pur aoba mangu tashi aser temeten magütsü tashi mokdangba mesalatsü ta JTCM-i ashi.

Ketdangsürtem aser United Naga Council (UNC)-i samaba civilian tem tia memetet liaka Kuki refugee 14 chiochtsü lemtetba anema JTCM-i tanü iba osang metetdaktüsügo.

Ozüng alema Kuki telungpurtem den külemi Leilon Veiphei Kuki village nungi refugee temi civilian trok pur ao. Iba tatalokba sülen hopta asemjungnüa süia aruaka ketdangsürtemi tanü tashi pamok menguteter mesüra chiochtsüsa mapa meinyakteter ta JTCM-i ashi.

Civilian trok tia mesüra kong ali memetet sür refugee 14 chiochtsü lemtetba ya temeten anema inyakba mapa ka aser Naga kintem asoshi lendong lir ta pamoki ashi.

takhangba agütsüba nung civilian trok bushiteta chiochtsü, civilian trok lendong nungi jenbua maru tashi refugee 14 mechiochtsü, refugees aser telungpurtemi civilian tem apuba atema jungjunga bushisüngdang asütsü aser Manipur sorkari iba tebilemstü mekoktetba atema tenüing agütsü metetdaktüsügo.

Iba mokdang kübok national highways nung shishilembabaren ajak anentsü JTCM-i tetuyuba agütsüogo.

Parnokisa shisaliok rejutem, government & private offices, aser banking services ajunga shibangtsü metetdaktüsügo.

JTCM-isa taxis aser nija garitem dena public transport anentsü aser tanga tetuyuba ka magütsü tashi public sentong magütsü aser senzübing masütsü tetuyuba agütsüogo.

JTCM-i nübortem dang mokdang sülen anidaktüsü ayongzüko.

Iba ken o asoshi bangdak ketdangsürtem rongshitsü aser samaba civilians kidangi meyipa arutsü asoshi public-i amalitep alitsü nüngdaker ta JTCM-isa ashi.

CM Rio'er ministry nung Advisor tasen pungu shimoker

Kohima, June 1, 2026 (TYO): Nagaland Chief Minister Neiphiu Rio-i Hombarnü pa indang ministry nung temelenshi kar süogo aser ibaji MLA tasen pungu Advisor ama shimokba lir.

Nübortem ajangzütsü atema MLA tem Advisor ama shimoker aser mapa lemszütsür ta Cabinet Secretariat sangdong ka nung ashi.

Hombarnü tasen shimba Advisor temji Kuzholuzo Nienu, Puthai Longon, Picto Shohe, Achumbemo Kikon, Nyusietho Nyuthen aser Daochier I. Imchen nunger lir.

Kuzholuzo Nienu nem Science and Technology, Puthai Longon nem Taxes, Picto Shohe nem New and Renewable

Energy, Achumbemo Kikon nem SCERT and Food Processing, Nyusietho Nyuthen nem Nagaland State Disaster Management Authority & Inland Waterways aser Daochier I. Imchen nem pa tebui inyakba Information and Public Relations and Soil and Water Conservation portfolio tem lemszütsüogo.

Minister-in-charge temi tatembang lemtetem magidang Advisor temi bangdak department nem parnok tebilembatem ashitsü akok ta sangdong nung shia lir.

Assembly Secretariat ajanga Nagaland Legislative Assembly nung züngsem ka ama agütsüba dak alaka Advisor tem nem pay, salary, emoluments,

remuneration mesüra additional perks kecha magütsütsü ta Cabinet Secretary Sentiyanger Imchen-i sangdong nung metetdaktüsügo.

Tang tesüsabuba reshuffle sülen Rio'er ministry nung Advisor 29 kümogo aser iba ajanga state sorkar indang administrative support structure ulushiogo.

2023 elections sülen Chief Minister Rio-i tang mezüing atema pa indang ministry reshuffle süogo.

Yaküm October ita Nationalist Democratic Progressive Party (NDPP)-i NPF den ka küma loktepa sülen NPF MLA ana ana- Nienu aser Kikon na Rio'er ministry nung anioka liasü.

NEET-UG 2026 re-exam akhi ama dang agütsü: SC

New Delhi, June 1, 2026 (Agencies): June 21 nü NEET UG 2026 re-exam ji physical mode nungi computer-based mode nung agütsü atema asüingdangba Supreme Court-i magizük.

Ketdangpurtemi tatidang agütsü asoshi mapa teinyakdak mapang ka nung Supreme Court-i National Testing Agency (NTA) dang computer-based test (CBT) mode nung NEET-UG 2026 re-examination agütsü tetuyuba magütsütettsü ta SC bench-i June 1 nü ashi.

NEET-UG re-examination ya pen-and-paper format nungi Computer-Based Testing (CBT) asütsüla ta benokba ken o Justice P.S. Narasimha aser Justice

Aravind Kumar na adenba bench-i magizük.

June 21 nü NEET-UG re-examination ya pen-and-paper format nung dang agütsü aser June 14 tashi nung re-examination atema admit cards agütsütsü imlar ta Supreme Court-i metetdaktüsü.

CBT mode nung re-examination agütsüba PIL ya advocate Satyam Singh Rajput-i benokba lir. NEET-UG tatidang nung paper leaks aser security tamakoktem ajuruba ajanga tesüiba nungi agia aruba examination system nung metokmeperi aliba sayur ta Rajput-i ashi.

Ajisüaka Supreme Court

bench-i iba PIL magizük aser July ita iba ken o benoka angadandang tebilemstü onüktem benoka lemsateptsü akok ta tanü oshidang agütsü.

NEET-UG 2026 examination ya May 3, 2026 nü agia liasü saka paper leak asüba ken o adokba sülen National Testing Agency (NTA)-i May 12, 2026 nü tatidang athitsü telemtetba agiba osang metetdaktüsü.

India aser bendanglen kaketsür 22.7-22.8 lakh shi kati iba tatidang agüja liasü saka tatidang agütsü anogo ishika lia WhatsApp, Telegram, aser coaching hubs nung tatidang indang guess paper mesüra question bank prokshia liasü.

UNC-i Kuki nunger 14 chiochtsü lemtetba athi

Imphal, June 1, 2026 (Agencies): United Naga Council (UNC)-i Home Commissioner Ashok Kumar aser tanga ketdangsürtem lia tanü 2:00 ako nung Kuki nunger 14 chiochtsü sentong renemba thinenogo.

Iba tebilemstü asoshi public tangatetba nung ajemdaker Kuki nunger parnok 14 chiochtsü aliba athir ta UNC-i taonung metetdaktüsügo.

"Naga public-i Kuki nunger 14 chiochtsüba atema tebilemba balala lemsatepa ajanga June 1, 2026 anüingdang 2:00 ako nung parnok chiochtsü aliba athir" ta UNC president Ng. Lorho-i sign asüba sangdong ka nung ashi.

Naga Village Guard-Northern Command ket nung aliba Kuki nunger 14 chiochtsü aser iba ya Naga sobaliba, Khristan tangatetba aser international human rights norms akhümsüba inyaker ta tanü UNC-i metetdakja liasü.

Alima nung Baptist



tamangertem, Naga arogotem, kin teloktem aser civil society organizations-i mepishiba den Union Home Ministry o Manipur sorkar nungi Naga civilian pur aoba bushitsü aser chiokdaktsütsü, aser parnok pur aoertem pua arutsü aser Suspension of Operations (SoO) ground rules inyaksü nangzüka nung ajemdaker Kuki nunger 14 chiochtsü ta UNC-i ashi.

Meghalaya CM Conrad K. Sangma aser Nagaland CM Neiphiu Rio na dena lennir aikati pua aliba Kuki nunger tatemzüka kecha melii chiochtsü mepishio go ta UNC-isa ashi.

Ajisüaka, public-i Kuki nunger

14 chiochtsü atema telatetba ayuba den ketdangsürtem den parnok chiochtsü asoshi kechi komala tatemzüka ayu ta metetnüa asüingdangtsü tenzü.

May 13 nü Leilon Vaiphei village nungi pur aoba Naga civilians trok indang osang kecha melii Kuki nunger chiochtsü lemtetba atema Naga teloktem aser züngsemtemi ashishiteptsü tenzü.

Iba anema Kangpokpi aser Senapati district tem kübok tesem kar nung tensa mejungi aküm aser külen Senapati district kübok Karong aser Imphal West district kübok Kanglatongbi nung nübortem lungkak aiba sentongtem agi. Parnoki Kuki nunger chiochtsüba magizüker ta ashiba den Naga civilians trok chiochtsü takhangba agütsü.

Public-i ola adokba agi United Naga Council (UNC)-i sendaktepa alir ajak den asüingdangya asü aser olemtepba sülen Kuki nunger 14 chiochtsü aliba sentong athitsü lemtet.

Dimapur nung WATSAN Committee atema sentong ayongzük



Dimapur, Aami/June 01 (TYO): PHED Urban Division, Dimapur ajanga District Administration Dimapur den lungjemer Dimapur district kübok WATSAN Committee züngsemtem nem Solid Waste Management Rules, 2026 dak sensakba nung source sustainability aser World Environment Day 2026 amungtsü asoshi tali rajemdaktsüba sentong ka Superintending Engineer, PHED Dimapur Circle indang office nung June 1, 2026 nü ayongzükua liasü.

Iba sentong ya "Swachh Gaon, Surakshit Jalvayu" omen kübok agia liasü, koba World Environment Day 2026 aser Environment Week nung shilem ka ama liasü. Sentong nung shilem agirtem nem source nung jana bensaba, scientific yimya amshia jana indokba, jana

prokshiba aser open dumping nungi nokdangba, nüburtemi shilem agiba aser libajen müreka ayuba nung lokti tentet balala teinyaktsü densema Solid Waste Management Rules. 2026 indang tongtipang teinyaktsütem tali rajemdakja liasü.

Iba ozüng shidak amshitsü atema Supreme Court nungi totuyuba agüja aliba indanga ketdangsur temi rateta ashi aser source segregation, stakeholder accountability aser sustainable waste management practices atema grassroots level nung mapa shidak inyakba indanga angatetdaksü.

Iba sentong nung 'source sustainability' nung ranglok aser catchment area protection ajanga tajemtsü tzu wazüka ayuba, groundwater recharge initiatives, süngdonglidong atemba, tzu mopung

menenba nungi nokdangtsü mera agiba, tzunglu tzu bendena ayuba aser nüburtemi anir conservation mapa inyaktsü nungdakba indang jembia liasü.

Tang aser tarutsü putu asoshi tzu wazüka yutsütsü atema water source kumzükua ayutsü tongtipang lir ta iba sentong nung shilem agirtem nem angatetdaksü.

Iba sentong nung shilem ka ama, libajen wazüka ayutsüba, sustainable living practices aser ali rongsen wazüka ayutsü asoshi nüburtem teinyaktsü indanga jembia liasü.

Village Councils aser WATSAN Committees tem dang pei yimtsüngtem nung jana bensatsü, tzu sources kumzükua ayutsü aser libajen wazüka ayuba maparen anir inyaktsü asoshi ayongzükua sentong tembanga liasü.

WTC by-election atema nomination papers scrutiny süogo

Dimapur, Aami/June 01 (TYO): Tsumang-B Ward-8 nungi Wokha Town Council by-election atema nomination papers scrutiny maparen June 1, 2026 nü Assistant Returning Officer and ADC Wokha, Renbomo Ezung

indang office chamber nung agia liasü.

Iba scrutiny ya Observer, Y. Chingyak Konyak, Joint Secretary, DUDA lia agia liasü. Nomination papers asadanga sülen candidates anaprong agizük aser

aruya aliba election nung tokteptsü temsüa lir ta sangdongogo.

Ibai by-election atema candidates tem tokteptsü temelaba agütsüba ka lir, koba inyakyim shidak amshia election maparen tenzüker alitsü.

Brahma Kumaris ajanga Kohima nung anti-tobacco campaign tenzük



Kohima, Aami/June 01 (TYO): World No Tobacco Day nungtem nung Brahma Kumaris Kohima centre ajanga Hombarñü "Unmasking the Appeal: Countering Nicotine & Tobacco Addiction" omen kübok anti-tobacco awareness campaign aser youth wellness drive tenzükogo.

Iba "Youth Wellness and Awareness Programme" ya Brahma Kumaris indang Education, Medical and Youth Wings kübok Rajyoga Education and Research Foundation ajanga ayongzük, kong Kohima, Dimapur aser Diphu nungi NCC cadets, kaketshir aser delegates tem dena liasü.

Iba sentong nung Delhi nungi neurologist Dr. Swapan Gupta-i Northeast nung moko

taoksatsüka achiba indang lemsatap aser mokozü madokba moko timtiba achir, talisa arishi küm 15 nungi 19 tsüngta, rongnung ka lir ta ashi.

Nicotine addiction ajanga tezü nung kongshiba indang rateta jembidang, moko achiba ajanga tekolok nung 'dopamine' tali kumdaktsür, aser ibaji ajanga pei sasa azüokba tashi mait akumer aser tangar dak metaloka aliba adokdaktsür, ta Dr. Gupta-ashi. Cognitive therapy, meditation aser mindfulness ajanga moko addiction koktettsü ta pai ashi.

Paisa tsürabortem dang pei tanur addiction nungi takok angutsü asoshi temeim sayua aser ajungmesoa yaritsü ayongzükua liasü.

Iba sentong nung tongti

tesemdanger Inspector General Assam Rifles (North) ajanga lanurtem dang moko aser temesepba mozü nungi pila alitsü asoshi yimya sübatsü ayongzükua liasü.

Linük ka yangerba nung lanurtem ya kanga tongtipang lir aser linük tashi ita alitsü ya tangatetba shidak aliba nüburtemi lenla ajaklen tajunglen agi yaritepba nung keta lir, ta pai ashi.

Iba sentong nung anti-tobacco campaign materials saya, BK Sis Meena-i anir anti-tobacco pledge agi aser iba sülen 13 Assam Rifles nungi Deputy Commissioner's Office, Kohima tashi awareness rally ka IGAR (North) ajanga tenzükja "Say No to Tobacco, Choose Life" osang bener jaja liasü.

Dimapur nung World No Tobacco Day 2026 amung

Dimapur, Aami/June 01 (TYO): National Tobacco Control Programme (NTCP) Dimapur ajanga May 31, 2026 nü St. John Higher Secondary Residential School, Dimapur nung World No Tobacco Day 2026 munga liasü.

Sentong akhumdong ka ama DEO Dimapur, Y. Mughaho Zhimo-i jembidang, lanurtem dang moko mamshi alitsü ajungmesoa liasü. Addiction nung jantratemtsü kecha mali aser alimai Hai ta ashitsü na ajungshidang nai Mah ta shitetbaji chichiba tashi lir, ta ashi.

Omen nung ajemdaker jembir Dr. Sentirena Jamir-i visual presentation ajanga lanurtem moko achitsü mesüzüksü asoshi tasa balala amshiba indang lemsatapa liasü. Lai moko ajanga nisung temang nung timtem balala agütsüba

indang rateta ashi aser lai anir anti-tobacco pledge agia liasü.

District Nodal Officer (NTCP), Dr. Jeshua Nchang-i sentong nung jembidang nicotine dak 'addictive properties' aliba indang rateta ashi. Nicotine ya kanga 'addictive chemical' ka lir, koba ajanga tekolok inyakyim melenshitsü, anungji iba chemical amshir temi yutsütsü tasak akumer, ta pai ashi. Paisa moko tebilemetsü külemi koktettsü asoshi ayongzükua liasü.

Iba sentong nung poster yangluba, essay züluba aser painting nung takok angurtem sangdonga sempet agüja liasü.

Iba sentong nung St. John Hr. Sec. Residential School tesayur Imlikumla menden liasü aser Imkumla Aier, Psychologist NTCP ajanga pela agizükba o jembia liasü.

Mokokchung nung World No Tobacco Day amung

Dimapur, Aami/June 01 (TYO): District Tobacco Control Cell Mokokchung ajanga May 31, 2026 nü "Unmasking the appeal-countering nicotine and tobacco addiction" omen kübok Impur Baptist Church Youth Ministry nung World No Tobacco Day munga liasü.

Iba sentong nung omen dak ajemdaker Dr. K Tiasenla, DNO NTCP ajanga jembidang moko achiba ajanga temang nung timtem agütsüba indang rateta ashi.

Nukshiwati, Consultant NTCP-i moko amshiba agi kongshiba aser iba awareness indang jembia liasü.

Pai jembidang, moko ya temang asoshi timtem agütsüba kisung masü saka yimya tamajung ka lir ta ashi.

Iba sentong nung shilem agirtemi moko machitsü aser moko anema nokdaktsü tenanzükba agi aser IEC oset lema agüja liasü.

Sentong nung Impur Bible Seminar aser Impur School of Nursing nungi kaketshir 250 dak tema dena liasü.

Wokha District Bharat Scouts & Guides aniokba sentong agi

Dimapur, Aami/June 01 (TYO): Wokha District Bharat Scouts and Guides pur Induction and Award Ceremony sentong June 1, 2026 nü Deputy Commissioner, Wokha indang Conference Hall nung agia liasü.

Iba mapang Deputy Commissioner, Wokha, K. Mhathung Tsanglao ya WDBS&G indang tir ka ama aniok aser Senior SDEO Wokha, Nchumbemo Jami ya WDBS&G indang Secretary ama anioka liasü.

Deputy Commissioner, Tsanglao-i iba sentong nung jembidang, Wokha district nung aliba kaketshir reju temi Bharat Scouts and Guides movement nung shilem agitsü ajungshitsü tongtipang ta ashi.

Scouting and guiding ya voluntary services ka lir, koba ajanga libaliru melenshir, yimya tajung adokdaktsür, takum melenshitsür, lenir sempet arangshir, practical life skills aser lendong timtem mapang takum kumzükua alitsü training agütsür, nübur tenzüktsü sayur,

ta ashi.

Iba yagi career tsütsü maongka lapoktsür, anungji kaketshir temi pei medemer ajungshitsüla aser kati ka yariteptsüla, ta pai ashi.

Secretary WDBS&G, Nchumbemo Jami-ia o tatsüka jembidang, district nung iba movement aintsü asoshi yariteptsü aser amaliteptsü, ta ashi.

Iba sentong nung DEO and District Chief Commissioner, WDBS&G, Raphael Zubonthung-i pela agizükba o jembia liasü.

Iba sentong nung Cistus School nungi Scout Master Zuben Tsopoe nem Best Unit Leader (Scout Master) sempet agütsü aser LMS nungi Guide Captain Arenu Humtsoe nem Best Unit Leader (Guide Captain) sempet agüja liasü. Maneni Best Unit Award ya Cistus School, Wokha nem agütsü.

GMS Wokha Town indang Scout Master-i iba sentong nung melepzung o jembia aser National Anthem tena sentong tembanga liasü.

CMO Peren-i Medical Board atema metetdaksür

Dimapur, Aami/June 01 (TYO): Chief Medical Officer, Peren, Dr. K Limarula Ao ajanga sangdong ka nung Peren district nung aliba department ajanga dang service confirmation atema district Medical Board ya June 23, 2026 anepdang 10:00 ako nungi tenzükua Office Conference

Hall, CMO, Peren nung amentsü ta metetdaksüogo.

Grade-III aser Grade-IV employees shirnok confirmation invalidation aser commutation of pension amala atema lir, parnok tenung ya CMO Office, Peren nem June 20, 2026 tashinung agütsütsüla, ta sangdong ajangasa metetdaksü.



June 01, 2026 nü Australia Deputy Prime Minister aser Defence Minister, Richard Marles-i National War Memorial semdangba mapang 'visitor's book' nung oren kar zülua toksüdang tangokba noksa nung angur.

Madhya Pradesh nung UCC atema committee ka tentetogo

New Delhi, Aami/June 01 (Agencies): Madhya Pradesh state sorkari state nung Uniform Civil Code (UCC) benoktsü atema inyakyim tenzükogo, ta Hombarnü Chief Minister Dr Mohan Yadav-i metetdaksü. UCC asadanga draft asütsü atema taoba mapang Supreme Court nung judge ka leniba nung high-level committee ka tentetogo. Mantralaya nung osangbenertem den jembidang Dr Mohan Yadav-i, Uniform Civil Code ka benoktsü atema mapang tongogo, kechiyong yimsü balala amanger tetsürtem atema ozüing aser telatetbatem balala menüingdaker, ta metetdaksü. Paisa, UCC ka kübok Madhya Pradesh-ia senso ajak

atema kasa ozüingtem benoktsü nüngdaka kümogo, ta metetdaksü. Chief Minister-i, tang state asem- Uttarakhand, Gujarat aser Assam nungbo Uniform Civil Code mapa küma benoka lir, yamaji Madhya Pradesh sorkaria state nung iba ama ozüingji benoktsü atema telemtetaba agiogo, ta metetdaksü. Iba inyakyim atema sorkari high-level committee ka tentetogo aser iba committee nungji lenla balala nungi mongintem densema lir. Taoba mapang Supreme Court nung judge ka leniba nung committee jagi Madhya Pradesh nung district ajak sema senzüsü aser yimsü balala amangertem densema

sensotem dang tebilemba asüingdangtsü. Dr Yadav-i, sensotem dang parnok tebilemba asüingdanga aser shisa lemsatepa Uniform Civil Code benoktsü sorkar tebilemba lir, ta ashi. Loktliba nung ajak liromedema tesünep nung alitsü atema Ato kilonser Narendra Modi lenisüba nung state sorkari iba maparen kera inyaksü, ta paisa metetdaksü. Paisa, Uniform Civil Code benoktsü atema temsüa aliba state tem rongnung Madhya Pradesh densema lir, ta metetdaksü. Uniform Civil Code atema state sorkari temeja website ka tenzükogo, aser ibaji ajanga sensotemi pei tebilembatem lemsateptetsü, ta paisa shisem.

Ato kilonser Modi-i Myanmar Tir U Min Aung Hlaing ajuru

New Delhi, Aami/June 01 (Agencies): Hombarnü New Delhi nung Ato kilonser Narendra Modi-i Myanmar Tir, U Min Aung Hlaing ajuruua senden amen. Ato kilonser Narendra Modi-i jaokba nung ajemdaker Myanmar Tir U Min Aung Hlaing-i May 30 nungi June 2 tashi India semdang. Tir ka ama tang mezüing Min Aung Hlaing-i India semdang. Pa den Cabinet minister tem, tongti ketdangsertem aser business lenirtem arua lir. Amongnü National Security Advisor Ajit Doval-ia

Myanmar Tir Min Aung Hlaing ajuruua liasü. Ministry of External Affairs otongdar, Randhir Jaiswal-i X ajanga, "NSAAjit Doval-i tanü Tir U Min Aung Hlaing ajuruogo," ta metetdaksü. Honibarnü External affairs minister S Jaishankar-ia Myanmar Tir ajuru aser linük ana tsüingda tesendaktep tajungba akümtsü atema inyakba atema pa dang pelaba lemsatepa liasü. Jaishankar-i X ajanga, "Tanü New Delhi nung Myanmar Tir U Min Aung Hlaing ajuruogo. Asen linük ana tsüingda tesendaktep

tajungba akümtsü atema inyakba asoshi pa dang pelaba lemsatepogo. Asen linük ana tsüingda tesendaktep kübok yimjung, terenlok aser azükaru atema inyaksü asoshi pai Ato kilonser Narendra Modi ajurutsü," ta metetdakja liasü. Min Aung Hlaing-i Bihar kübok Bodh Gaya tama semdangba sülen Delhi-i ao. Min Aung Hlaing Bihar atongba sülen pai Mahabodhi Temple tama semdanga liasü. Iba tekülem ki ya Buddhist nung temeshi ainlen jajartemi kanga sapua semdangba temeshi tesem ka lir aser UNESCO World Heritage Site lir.

Cockroach Janta Party tentetsang Dipke Delhi-i meyipa arutsü

New Delhi, June 01 (Agencies): Cockroach Janta Party (CJP) tentetsang, Abhijeet Dipke-i pa June 6 nü Delhi-i meyipa arutsü aser Delhi nung aliba Jantar Mantar nung longkak aitba sentong tenzüksütsü, ta metetdaksü. NEET-UG 2026 paper leak asüba dak sendakba nung Education Minister Dharmendra Pradhan menden nungi anenjang ta takhangba agüja longkak aittsü. Boston nung alisang Dipke-i CJP ya tenteta liasü. Examination nung ochimashi dak sendakba ken o ka angadanga mapang nung Chief Justice of India (CJI) Surya Kant-i leplu (cockroaches) tetshia liasü, aser iba nungji ajemdaker Dipke-i CJP ya tentet. Dipke-i X ajanga, education minister anema longkak tesashiba aittsü atema pa India-i meyipa arutsü pai telemtetba agiogo, ta metetdaksü. NEET paper leak ajanga kaketshirtem million aika takoksa nguogo, ta pai metetdaksü. "Asenok ajak longjemtsü atema mapang tongogo. India temzüing lenmang nung jaja onoki tesünep nung longkak aita Dharmendra Pradhan menden nungi anentsü atema takhangba agütsütsü," ta pai metetdaksü.

Pradhan minister menden nungi anentsü atema takhangba agütsüba online petition ka nung kaketshir lakh 8-i sign süogo, aser iba campaign pusema Lucknow, Jaipur aser Maharashtra densema linük tesem aika nung longkak aitogo, ta pai metetdaksü. NEET, CBSE aser CUET dak sendakba nung kaketshirtem aika takoksa nguogo, ta pai ashi. "Yamaji aibelen tulu inyakaaka Education Minister-i menden nungi manenra, iba tetezü iba linük nung aibelenba tenüing agir mali. Item ama inyakyim tamakok ajanga kaketshirtem takoksa angur," ta pai metetdaksü. Dipke-i, pa June 6 nü Delhi tonga arutsü aser Jantar Mantar nung longkak aittsü atema police dang nungi temelaba meshitsü, ta metetdaksü. Pai kaketshirtem aser lanurtem danga, sorkar dang nungi telangzüba meshitsü atema temeden amshiba nung shilem agiang, ta ayongzüik. Dipke-i, "Ozü medemertem aser kibong züingsemtemi ni pua jail nung puoktsü tsüba bilemstür. Ajsüiaka asen linük ya democracy linük ka aser tesünep nung longkak aittsü atema onoki temelaba angutsü ta ni amanger," ta metetdaksü.

Centre sorkari Supreme Court judge pongu shimogo

New Delhi, June 01 (Agencies): SC Collegium-i benokba nung ajemdaker Centre sorkari Supreme Court nung judge pongu tasen shimogo, aser ibaji ajanga SC nung judge ajak senteper 37 ajungtsü, ta osang ka ajanga metetdaksü. Union Law minister Arjun Ram Meghwal-i X ajanga, linük temzüing kübok Arlla 124 (2) nung ajemdaker high court nung Chief Justice pezü aser Senior Advocate ka Supreme Court nung judge shimba linük Tiri agizükogo, ta metetdaksü. Centre sorkari shimba Judge ponguji- Justice Sheel Nagu (Chief Justice of Punjab & Haryana high court), Justice

Justice Sanjeev Sachdeva (Chief Justice of Madhya Pradesh high court), Justice Arun Palli (Chief Justice of high court of Jammu & Kashmir and Ladakh) aser senior advocate Venkita Subramani Mohana nung lir. May 27 nü Chief Justice of India Surya Kant leniba nung SC Collegium-i parnok ponguji SC nung judge shimtsü atema sorkar matsüingdang benoka liasü. Centre sorkari Supreme Court (Number of Judges) Amendment Ordinance, 2026 nung ajemdaker tang Supreme Court nung judge teimba agi 34 lateta aliba nungi 38 akümtsü atema telemtetba agia liasü. Tang judge pongu shimba S h r e e sülen Supreme Court nung Chandrashekhar judge ajak senteper 37 (Chief Justice of Bombay high court), judge menden ka tazüing alitsü.



June 01, 2026 nü Gurugram nung Haryana police-i state Police indang Emergency Response Vehicles (ERVs) tenzüksüsdang tangokba noksa nung angur.

ZONAL OFFICE, GUWAHATI
1st Floor, Dwarka Center, Lachit Nagar, Sani Ram Bora Path, Bora Service, Ulubari, GS Road, Guwahati-781007.
E-mail: gad_guw@bankofmaharashtra.bank.in : dznguwahati@bankofmaharashtra.bank.in

TESEM NÜNGDAKER

Bank of Maharashtra-i teküboklen shia aliba branches atema ground floor nung area 800-1000 sq.ft. aliba kiburtem/power of attorney holders dang nungi offers meshir.

1. Weziho, Meluri District (Nagaland, PIN 797114)

Iba ama tesem nungji gari tanendak aser amenities atema facilities ajak alitsüla. Tesemji ita ana tsüingda atsünga agütsü atema renema alitsüla mesüra terenemer alitsüla. Tejangrar bidders-i offers ji technical bid aser price bid atema sealed covers temeja ana nung Zonal office, Bank of Maharashtra, 1 st Floor, Dwarka Center, Lachit Nagar Sani Ram Bora Path, Bora Service, Ulubari, GS Road, Guwahati-781007 dangi June 22, 2026 anogo tashi nung mesüra iba anogo matongdang yoktsüla. Public sector units /Govt. Departments meyong tesem nem tama maongka agütsütsü. Osang tejangja atema onok indang website www.bankofmaharashtra.in nung tender section nung repringang. Kuli kecha memetetdaksü offers agizüksü mesüra magizüksü bank dak temeden lir.

Place: Guwahati, Date: 01.06.2026 Sd/- Zonal Manager, Guwahati Zone



TIR YIMYIM YIMOBILEM (EDITRIAL)

DIMAPUR TUESDAY, JUNE (AAMI) 02, 2026

Kilir ayuba sobaliba

Asenok kidang tangar kin, talisa Nagaland anüdoklen alir kintem nungi tanurtem anir arua lidaktsür. Itemji teimbaka kaketshisatsü angazükdaktsütsü asoshi anir arubatem asütsü aser ano karbo kidang kilir mapa inyaktsü asoshi anir arubatemala alitsü. Atangji, item tanurtem rongnungji aika tajung akümer saka ano aika dak taliba ki kibur dang masü saka kin dena tenüngmenütsüsa ataloker. Aji oda, tang Dimapur nung asen nisung kidang school zünga alitsü asoshi anir aruba jala ka dak atalokba ama atalokdang, asenok ajak mak asür. Iba ama mapang nung asenok kidang tangar kin nungi tanurtem anir arua mayutsüla ta pi kini ozünga metetdaktsü dang, asenok tejak metenteti bilemer, kechiyong asenoki asenok kidang tangar chir anir arua ayubaji meima anepalur masü saka kilir dang nungi tamajungba alar jenjang nung yur reshikangshia mapa inyakdaktsür amai ajaki bilemer. Atangji, nisunger yimya asünungji, karibo pi chir anir arua pei kidang lidakja school züngdaktsübaji pei chir den kasasa meima anepalutsü saka ano karibo meketmesüngia amshitsü. Aji oda, asenok ajak asoshi tia majung kaji, alima nung ya aseni tajung aser temeim mapa inyakbabo shingaia mejembitsü saka nisung kari tamajung tilaka danga inyakra, ajibo alima sünga jembutsü. Aji oda, asenok kidang kar school zünga aser kar kilia aliba mapang, chisüng dang chiyongdaktsüba indang kanga jembir saka chi talem chiyongba indangbo shingaia mejembir. Atangji, alima nung, asena pia, ki tajung nung chiyongtsü tajung chiyonga intetba purtem aika tajung makümer, ajsüaka shirnok chisüng chiyongtsüa mengui tim atemer parnokjiang tajung akümba asenoki angur. Aji oda, asen chir pi kidang aliba mapang, taküm piyong alitsü masüji kiburi ashi angaa timtem arema liangma nuo ta ashir masü saka kiburi chisüng chiyongdaktsür asü, talem chiyongdaktsür ? Kiburi mapa tasak inyakdaktsür asü, ayongayonga anisüngzüka kazüdaktsür ? ta dang asüngdanga tanurtem nem timtem teraka danga majangshidaktsünüi tsüraburtemi jembira, iba jagi tanurtemji tajung makümtsü. Aji oda, asenokia memesütet aser tangar kidanga melitet ta tom nung tanur aika taküm raksatsü ana nung lir. Atangji, shir kidang südir sang tanur tila anir arua kilir mapa inyakdaktsübajibo ozüngi memelar, anungji tamasayongi kidang kilir asütsü atemabo pi chir tanur tila kidangi anir marutsüla. Asenokibo asen kidang tanur tila tangar kisemer arudang tzü aser süngo agütsübaji azüazür aser asen akhüm aketer ta bilemtsüa akok saka aji tangar tashitemeteter tsüngdangbo asen mashimalu tuluka sayur asütsü. Aji oda, kidang kibong nung kinungtsüia aser kinungbuia kisemer nem tzü aser süngo agütsübaji peisasa pei lua inyaker amai mebilemtsüla. Ashiko, asenok aikati tangar kisemer arudang, tanur chanu ka nem kilir mapa inyakdakja tzü aser süngo agütsüdaktsüba jagi asen takar tular jenjang ka sayur amai bilemtsüa akok, saka aji agi asen mashimalu aser tokolok mesalaba tamaitü sayur. Atangji, asen tanuri agütsübajibo junger. Aji oda, temeim mapa inyaknertem asoshibo anüdoklen nungia sang, anülulen nungia sang sensakertem kibong nungi tanurtem anir arua school züngdakja tajung kümdaktsübaji taküm nung takok, tepela aser temoatsü tuluka asütsü. Iba amaji temeim agi teimla makaba purtem nem teimla agüja tajung kümdaktsütsü asoshi tangatetba ka melira pei kidang pi chir anir arua kilir dang nungi teküpbokba jenjang nung alar ama mapa inyakdakja lidaktsütsü asoshibo tamasayongi anir marutsüla. Ibaji Tsüngrem tsüngdanga tai asütsü aser nisung tsüngdanga asen dang masü saka asen kin ajak tenüngmenütsütsü. Atangji, asenok asoshi tekümdangtsü kaji, tanü asüng ya asenok kidang kilir ayuba ya kibong ajak asoshi sobaliba tajung ka ama kümogo. Ajsüaka, kidang kibong nung kilir ayuba ajanga tajangzük anguba dang nungibo takoksa teimba angur, anungji kidang kilir ayuba ya asenoki sobaliba tajung amai bilemtsüa akok saka asenok loktiliba nung sobaliba tamajung ka tenzükbaji kidang kilir ayuba ya asütsü. Aji oda, kidang kilir ayuba ajanga pei chirnurtemi pei tetsü oshi mejembitet, pi den lia aotsüba yimya awashi memetet akümer aser kidang süngo yanglua mashi inteter. Ibaji kodang bilemdangdir, asen kidang kilirji tangar masü asenok aser asen chirnurtem asütsüla ta asenoki angatetsü aser ibajiang asen sobaliba asütsüla.

OLEMSABANG

YIMSÜSÜBA BANGDAKJI TSÜNGREMI SHIMTETBA ASER TEMESHI LIR

~ L. Kika Pongener

Yimsüsüba bangdak ya nisunger shisatsü agi purateta aser sangra-sangjia tenzükbba bangdak ka masü; lipokdang nungi Tsüngremi yanglua tenzüka yutsüba bangdak ka lir. Nisung'er shisatsü agi bilemtsübo; yimsüsüba bangdak ya shirnok ket nung rongsen aka, shirnok ket nung tashi ali, shirnok kenshi-oshi aser tangatetba aka, shirnok tashitemetet aka aser shirnok nutsüng-nubu aika lir; parnok jagi dang arakmoka yimsu asütsü amai bilemtsü akok. Laishiba nung züngdangra, alima nung chuba yimli-tem aser yimsüsüba bangdak ajak madakji tematiba Tsüngremi yimsu asür; aser chuba yimli aser yimsüsüba bangdakji Tsüngremi shir nem agütsütsü mulunger parnok nemji agütsür...."Mimchir yimli madak Tematiba Tsüngremi yimsu asür; aser aji pai mulunger nem agütsür" (Daniel-4:25). Yimden yimsüsüba mendenji Tsüngremi shimtetba aser Temeshi ta laishiba nung tejangja zülua angur...."Aser kechi bangdak lir aji Tsüngremi shimtetba" (Rom-13:1). Ano Tsüngrem o-i ashir...."Kechiyong chuba mendenji Temeshiba agi küma lir" (A.Shin-16:12). Atangji, yimsüsüba bangdakji Tsüngremi shimtetba aser Temeshi ta laishiba nung tejangja zülua angur. Atangji, yimsüsüba bangdak mendenji Tsüngremi shimtetba aser Temeshi menden asünungji....Nisung'er shisatsü taginuba, merumero, ambangyim aser tashiyim agi anitsüba bangdak ka masü ta angateter. Anungji Tsüngremi shimtetba bangdak aser Temeshi mendenji nisung'er taginuba shisatsü nem mekokdaktsüi asüngteta, meshiteta, meraketa aser ret-reta wazüka ayutsü yimsüsür ajak dak tangatetba alitsüla.

Tanü asen lima nung yimsüsüba bangdakji kechisa asütsü (?) ta shisadangra....State sorkar ketdangsua yimsu asütsü atema nuburtemi meyongnem (Vote) agüja shimtetba tatar (MLA)-tem dang ya-a yimsüsür ta ajatsü akok. Ano yimtsüngtem nung kin-kidong shia nungi teshimtet nubu, Putu Menden nung mener yimsu asütsü atema; shilang-alanga shimertem dang ya-a yimsüsür ta ajatsü. Kin shia telongjem 'Hoho' aser Tzükong shia telongjem lennirtem dang ya-a yimsüsür ta ajatsü. Ano Jila balala nung lokti-tentet balala (NGO)-tem ketdangsua anitsü atema nuburtemi tenung jateta shimba lennirtem dang ya-a yimsüsür ta ajatsü akok. Aji oda, shirnok nuburtemi tenung jateta; nubur madak yimsüsür asütsü shimteter; parnokji Tsüngremi shimtetba yimsüsür ta nubur ajaki agizüktsüla; aser parnokji nubur ajaki akümtsübuttsüla. Ano yimsüsürtem jagia nuburi akümtsübuttsüa pei taküm aser mapa agi liteta sayutsüla. Yimsüsür ajaki nisung nungi konang-nungsang aser temeden angutsü atema masü; saka Tsüngrem nungi maongka aser temeden angutsüa ochishia yimsu asütsüla. Tsüngrem oi ashir...."Nisung tsüngdang shitak mesukba lenmang ka lir; saka iba tatempangji tasüba lenmang" (A.Shin-16:25). Aji oda, ochi aser shitak ya tapu ana lir....Nisungi yangluba ochi aser shitak ka lir; aser Tsüngremi mulungba aser aginuba ochi aser shitak ka lir. Asenoki Tsüngremi mulungba ochiba aser shitakba nemji asen yimden aser loktiliba ajak anidaktsütsüla.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Chhattisgarh nung Tenla kidang Khristan 25 dak azük



May 31, 2026 nü Chhattisgarh kübok Sukma district nung kanga tezülen aliba yimtsüng ka nung Khristanem tekülem sentong agiba mapang nung Hindu nung telok kati amakba sülen Khristanem kar hospital nung tangokba noksa nung angur.

Sukma (Chhattisgarh), June 01 (Agencies): Amongnü (May 31) Chhattisgarh state nung kanga tezülen aliba yimtsüng ka nung Khristanem tekülem sentong agiba mapang nung Hindu nung telok kati amak, ta osang ka ajanga metetdaksü.

Iba tatalokba nung mashisa tetsür ka densema Khristan 25 yiru.

Sukma district kübok Sadrapal yim dak tekülem sentong nung adentsü atema Khristan 70 adenshia liasü.

Fellowship coordinator Hunga Mandavi leniba nung sarasadem sentong agiba

mapang nung Hindu nung telok ka arua parnok amak. Tenük kuli alirtemi ashiba agi, telok jagi tamangertem amakba mapang nung sentong lenir

Mandavi aser pa kinüngtsü (mashisa) na densema nisung aika yiru.

Khristan 25 shi yiru aser parnok pongubo kanga mejungi yirua Tongpal nung aliba Primary Health Unit-i anir oa treatment agidar. Ano karbo Sukma nung aliba District Hospital-i anir ogo.

Iba tatalokba dak sendakba nung First Information Report (FIR) ka benokogo aser

nisung aika anema ken o benokogo.

Khristanem i ketdangsertem dang iba tatalokba ya jungjunga bushisüngdangba sülen aibelenertem nem temerenshi agütsüsüla, ta takhangba agütsü.

Arogo nung lenirtemia sorkar ketdangsertem, ozüng benokba agencies aser meimchir temeden atema inyakba organisations dang takoksa angurtem aser kuli agütsürtem nem security agütsüba den külemi yirua alirtem nem medical teyari shidak agüjang, ta mepishi.

Nigeria nung Khristanem tepsetba bushisüngdangtsü UN dang mepishi

June 01, 2026: Nigeria nung Khristanem aser Islam yimsü alia mamangba Muslim nungertem jenti tepsetba ya jungjunga bushisüngdangtsüla, ta shia United Nations Special Rapporteur on Freedom of Religion or Belief nem temepishiba shidi ka agütsüogo.

Nigeria tesem balala nung Jihadist telok balalai yimsü nung ajemdaker Khristanem jenti tepsetba ya bushisüngdangtsüla, ta UN dang mepishi.

Genocide Watch aser Alliance Against Genocide nati temepishiba shidiji UN Special Rapporteur, Nazila Ghanea nem agütsü.

Genocide Watch aser Alliance Against Genocide nati, Boko Haram, Islamic State West Africa Province (ISWAP), Fulani jihadist aser Lakurawa densema Islami telok balalai 2001 küm nungi tenzüka tang tashi nung nisung 60,000 dak tema tepsetogo aser nisung million 2.2 jenshiogo, ta metetdaksü.

Item telok jagi talisa Middle Belt aser north tsütsü aliba regions nung Tenla kitem, Khristan yimtsüngtem, schools aser nüburtem kanga amaker, ta parnok metetdaksü.

2025 küm nungi tenzüka 2026 küm tashi nungbo Khristanem tepsetba tatalokbatem kanga bulua kümogo. Khristanem amakba

mapang nung security sepaitemi menokdangteter aser yimtenren lenirtemia aibelenertem anema kecha meinyaker, ta shidi nungji shia lir.

"Fulani, Hausa aser Nigerian Army nung Muslim nung General temi Khristanem amakbaji nokdangtsü atema kecha meinyaker. Khristan yimtsüngtem amakba sülen ang sepaitem item tesemji tonga aoer," ta shidi nung shia lir.

Ano külen Fulani Muslim nungertem parnok kiset shiruru chiyimdaksütsü atema Khristanem meyong ali atsünga agütsü asoshi jihadist telok nem sen agütsür.

Iba dak alia nisung melen sen akhangtsü atema Khristan lenirtem aser putirtem puer aoba tatalokba aika lir.

2024 küm kija nunga tetsürtanur densema nisung 580 puer oa liasü. Ozüng alema inyakba telok balalai nisung puer oa ayuba camps ji aika sepaitem camp anasa lir.

Nigeria nung talisa Benue, Plateau, Kaduna aser Kogi state tem nung Khristanem jenti tepsetogo aser aikati pei ki toktsür jenshiogo.

Benue State kija nungi nisung million tesadang kabo internally displaced persons (IDP) camps nung jenoka lir. Parnoki chiyungtsü, tzi tajemtsü aser mozü peria mangur.

Kasa shidi nungji yaküm June ita nung Benue state kübok

Yelwata yim dak Khristan 100 dak tali tepsetba aser kiojen rondoktsüba osang metetdaksa liasü.

Yaküm July ita nunga Plateau State kübok Bindi yim dak Khristan 27 tepseta liasü.

Melungtet telok ana jagi UN Special Rapporteur dang, Nigeria nung yimsü nung ajemdaker reshikangshibaji jungjunga bushisüngdangtsüla aser alima linüktemi Nigeria nung Khristanem tepsetba anentsü atema Nigeria sorkar rongshitsüla, ta metetdaksü.

"Tang Nigeria nung jihadist kiralongrartem Khristanem aser Islam yimsü alia mamanger Muslim nungertem anema rara ayonga lir. Khristanem jenti tepseter," ta parnok metetdaksü.

"Alima nung meimchir temeden atema inyakba teloktemi hopta ana tsüngda report tejangja angutsü imlar. Ibaji ajanga yimsü temeden amokmeren tia nung aliba aser Jihadist kiralongrartem Nigeria nung nisung jenti tepsetba osang jungkai adoktsütsü," ta parnok metetdaksü.

International Society for Civil Liberties and Rule of Law (Intersociety)-i ashiba agi, taküm January ita nungi April ita tashi nung Nigeria nung Khristan 1,400 dak tali tepsetogo aser Khristan 1,800 dak tali puer ogo.

ANO GO ABEN TSÜNGREM DEN

Lai ajunga nung tekong tatsütibaji 'Yisui ajep'.

Bethani yim nung lajar kibong ka tetsür chanu ana tena tenu Lazar parnok kiji akhidanga Yisui par kibong semdanga liasü.

Lazar sür külen pezü nübuba nung Yisu aru. Tetsür ana rongnung kati ashi, "Kibuba, na yangi ali asübo künu mesüla." Tamang tulu akaba kibong aser tetsür. Kechiba Yisui ajep? Lazar asübaji shia arutsütsüji pai temetet, sakasa tsüraburi par asem anojongi yakta toktsür asü nung, ano tenu tebur chanu kaji asü, tetsür tashi tila aser shisa tatsü pezü nü tashi mang ayimer, joko tashi mait. Ajisüaka, tamang tulu agi, na ali asübo künu mesüla ta Yisu dang shitet. Yisui sayutsüngidang yamai shia lir: Tajepertem den jeptepang. Pai shisabulurtem adianu sür tashi mait jepa liaka, tamang tuluji aria bilema ajep. Lazürbo shia aru, asenok Yisu dak amangertem dak aria bilem temeim aser tamang tashi itta alitsüla. Iba Yisu jaklaji ajizükdi.

Pakistan nungi tongti putirtemi Pope Leo ajuru



Pakistan nungi putirtemi Pope Leo ajurudang tangokba noksa nung angur.

June 01, 2026: May ita nung Pakistan nung Khristan putirtemi Vatican semdanga Pope Leo ajuruogo; putirtem rongnung archbishops asem, bishops pezü aser cardinal ka liasü.

Vatican semdangba mapang nung putirtem jagi Vatican departments balala semdanga report agütsü aser Pope Leo XIV ajuru.

Catholic Bishops' Conference of Pakistan Tir, Bishop Samson Shukardin-i Pakistan nung Khristanem timtem balala ajangshiba metetdaksa liasü.

Pai Pakistan nung Tsüngrem mezüngmeshiba ozüngtem tim mesüi amshiba, Khristanem bendanga züngshiba, kangshia Islam yimsü dangi meyidaksüba aser Khristan tetsür chanutem kangshia Muslim nung den kibong kümdaksüba metetdaksü.

Tamangertem timtem balala

ajangshiaka Pakistan nung Khristanem tamang tashi itta lir aser Arogo tashi itta lir, ta Bishop Shukardin-i metetdaksü.

"Ozü nüburtem (Khristan) aika tazüngba mali, ajisüaka tamang nungbo tashi tait," ta pai ashi.

Bishop Shukardin-i, Pakistan nung Khristanem nem kasa temeden magütsür, aser ibaji Khristanem nütsüng ishika dang asüba agi lir, ta ashi.

Paisa, kenü anogo nungbo Pakistan nung Khristanemia meimchir temeden angutsü aser kasa temeden angutsü imlar, ta ashi.

Pakistan nung putirtem jagi Pope Leo nem Pakistan nung carpet ka sempet agütsüba den külemi pa dang Pakistan semdangtsü mepishia liasü.

Ajioda Pope-ia Pakistan semdangtsü melunga lir anungji tarutsü nung ner linük semdangtsü bilema lidi, ta ashi.

AO OSHI ANGAZÜKDAK:

TANÜ ANGAZÜKTSÜBA OJANG



Yimjak

(adj) ajaki ngua mesüra meteta (publicly)

* Takoker nem yimjak nung tenüngsang agütsü.

Yimjana

(n) lokti menentsür, tashi manger (trouble maker)

* Kibong nung mesayu chirtem yimjana akümer.

OLONG PAITEP # 7522

15x15 grid for OLONG PAITEP # 7522 with numbers 1-17 placed in specific cells.

TIPLÉN

- 1. Nüji masü - (4)
3. Techinütsüka - (6)
7. Aketa shirangba - (5)
8. Pi - (6)
9. Amena - (5)
10. Kinü - (5)
11. Tanang masü - (5)
13. Lenmang - (6)
15. Nübo tedi - (5)
16. Tuoshi - (6)
17. Shiruru apuba temenatsü - (4)

LANGTSÜNGLEN

- 1. Jila tulu - (5)
2. Sarasademdang tembang - (4)
4. Tarutsü indang ashirtem - (6)
5. Alia - (5)
6. Mojing - (5)
9. Tai inyakba metet - (5)
10. Medemer chijiba - (6)
11. Tatokba / Amadok - (5)
12. Anüngdang masü - (5)
14. Jabaso masü - (4)

OLONG PAITEP # 7521 TELANGZÜBA

TIPLÉN :

- 1. Tesangra, 5. Mungo, 7. Kisen,
8. Salem, 12. Semki, 14. Kilem,
15. Kensü, 16. Sangpang.

LANGTSÜNGLEN :

- 1. Temesen, 2. Raksa, 3. Aon,
4. Aso, 6. Nile, 9. Alizüng,
10. Omen, 11. Lemta, 13. Ola,
14. Kin.

NAI-A YA METETTER



Alima nung nüngtugu rapper Kanye West-i Turkey nung May 30, 2026 nü Atatürk Olympic Stadium nung kenten sentong ka agidang nisung 118,000 tashi adenshia liasü aser iba ajanga world-record-setting concert ka ama züngsemogo.

Istanbul nung ayongba kenten sentong nung nisung aika aden aser "highest-attendance stadium concert in the world" otsü yangluogo.

Iba kenten sentong ya NTRteam den yaritepa ayongzük aser Türkiye den U.K., Germany, France, Netherlands, Italy, Russia, Poland aser Middle East nungi nisung aika aden.

Union transport minister-i Tirap nung APSTS bus 3 sayatsü

Itanagar, June 1, 2026

(Agencies): Union Minister of State for Road Transport and Highways, Ajay Tamta-i Arunachal Pradesh State Transport Services (APSTS) indang bus tasen asem sayatsüogo.

APSTS küm 50 ajungba benjungmung nung shilem ka ama Ajay Tamta-i Khonsa nung bus tasen asem sayatsü.

1975 küm APSTS-i Khonsa nungi bus ka agi maparen tenzüka liasü. Union MoS Tamta-i bus tasen asem sayatsüba ya Tirap district nung public transportation services tajungba asoshi bendanga agütsüogo.

"Transport department aser APSTS-i meta talang pilar alidak sendaktepba aser state tesem ajungalen socio-economic development nung shilem agitsü tenzüker küm 50 ajungba atema tenüngsang

agütsür" ta Tamta-i ashi.

"Transport infrastructure tashitait aliba ajanga terenlok bentsür arur aser National Highway-13 amala mapatongtem ajanga tourism ajungketsü, taküm libaliro tajungba akümtsü aser rongsenketzung renloktsü" ta pai ashi.

Union Minister Tamta-isa Arunachal Pradesh nung Central Road and Infrastructure Fund (CRIF) ajanga road infrastructure development nung Centre sorkari maneni yaritsü nangzük.

National Highways and Infrastructure Development Corporation Limited-i Viksit Bharat 2047 mangdang den liromedema mapatong aika inyakdar ta paisa shisem.

Iba sentong nung Arunachal Pradesh Transport Minister Ojing Tasing-i Khonsa nung

modern bus terminal ka yanglutsü osang metetdaksü.

Iba ya Khonsa aser temeket nung alirtem asoshi golden jubilee sempet ama asütsü ta pai ashi.

MLA Wanglin Lowangdong-i küm tenem tejen bus station jenjang ajungketsü aser luxury bus services tenzüksüla ta tebilemba ashiba sülen Minister Ojing Tasing-i iba osang sangoktsü.

Arunachal Pradesh nung transport stations 18 aliba dak alia transport infrastructure projects aika tang teinyakdak lir Tasing-isa metetdaksü.

Arunachal East MP Tapir Gao-ia transport sector nung human resource development nüngdakba indang jembu.

Pai drivers, conductors aser mechanics asoshi mapang shia training programmes agitsü aser passenger safety o service quality ajungketsü ayongzük.

Tinsukia nung ULFA (I) den yariteper 2 apu; Hopta ka nung 12 puogo

Tinsukia, June 1, 2026

(Agencies): Tinsukia Police-i May 30 nü United Liberation Front of Asom (Independent) den tesentaktep alir lanur ana puogo.

Pengeri area nung apuba nisung ana ya Dulav Moran aser Rongat Moran na ta jangjaogo aser tenaprong Nalani village nunger lir.

Tenati ULFA-I atema sendakteper ama inyaka aru aser telungpur telok o local contacts

tsüngda communication channels ayu ama temulung melemi bilemer. Tenati ULFA-I züngsem akümtsü sentong liasü ta police-i ashi.

Osang tejangja kar angazükba nung ajemdaker

Tinsukia Police-i special operation ka agidang tena apu.

Taoba hopta ka tsüngda Assam aser tanga State tem nung ULFA (I) den tesentaktep alir nisung 12 tashi puogo ta police ketdangsürtemi ashi.

Item maparen ajanga Tinsukia district nung ULFA-I indang network tulu ka raksatsüogo ta parnokisa ashi.

CM Khemchand-i Lainingthou Sanamahi Temple Board president inyaker

Imphal, June 1, 2026

(Agencies): May 31, 2026 nü Manipur Chief Minister Yumnam Khemchand Singh-i Lainingthou Sanamahi Temple Board (LSTB) President inyaksü atema tezüngzüktep agiogo.

Lainingthou Sanamahi Temple Complex, Imphal nung sentong ka nung Khemchand-i tezüngzüktep agia liasü. Iba sentong nung board züngsemtem, putirtem aser tekülemertem aden aser parnoki CM Khemchand

pelashishia agizük.

Khemchand-i tezüngzüktep agiba sülen state nung lokti tejakleni aotsü aser renloktsü atema sobaliba senmang aser inyaksangshitem wazüka ayutsü kanga tongtipang ta ashi.

Manipur nung lisopurtem sobaliba inyaksangshi kümzüka ayutsü aser ajungketsü maparen pusema nungitsü ta paisa ashi.

Temple complex tiptema ayutsü aser tajungba kümdaktsütsü asoshi board

meetings nung lemtetem agitsü akok. Tanü Manipur nung yimjung aser tesünep nüngdaker aser state tejakleni aotsüla ta CM Khemchand-isa metetdaksü.

Iba sentong nung Kabui, Chothe aser Maring kintem nungi teshimtet nübotemi Chief Minister Khemchand nem sobaliba sü agüja tetushi agütsüogo.

Iba sentong nung shilem ka ama pai temple grounds nung süngdong ka atem.



Assam Rifles-i Mizoram nung tzüngluruwa matongdang operational preparedness tajungba akümtsü atema anogo pungunü Boatmanship Training Cadre ka agiogo. May 26 nungi 30 tashi agiba training nung boat handling, river navigation, flood rescue operations, casualty evacuation, outboard motor handling, safety procedures aser tactical river-crossing techniques sayuogo ta Assam Rifles sangdong ka nung ashi.

South Korea: Hanwha Aerospace plant nung nisung 5 pokset



Seoul, Aami/June 1 (Agencies): South Korea kübok Daejeon yimti nung rocket propellant yangluba Hanwha Aerospace indang factory ka nung Hombarnü langka poka mi adokba sülen nisung pong aser nisung ana yirua liasü, ta ketdangsürtemi metetdaksü.

Teküzmüker ana rongnung kabo mi agi kanga mejungi ronger liasü, aser tenaprongla ya tenasasa iba facility nungi jena ao, ta fire ketdangsür kati ashi.

"Ketdangsürtemi asürtem mejangjateti lir, kechiyong tasümayang ya kanga mejungi raksar lir," ta health ketdangsür kati ashi.

Fire ketdangsür kati ashiba agi, iba falicity nung langka apokba ajanga mi adokdaksü, ajisüaka kechi apok aji mejangja

aser tang bushisüngdangdar. Iba lendong atalokba sülen anüngdang tashi nung Hanwha indang share shilem 2.8 agi tajemba aküm aser holding company Hanwha Corp indang share-a shilem 3.4 agi tajemba küma liasü.

Rocket propellant yangludang amshiba osettem nung tzü amshia explosive osettem merekba mapang apok asütsü ta bilemer, Hanwha ketdangsür kati ashi.

"Onoki asürtem aser parnok kinungertem dang tatok meshir," ta Chief Executive Officer Son Jae-il-i ashiba den, iba lendong kodaser atalok aji jangjtsü atema bushisüngdangba mapang ketdangsürtem den teka amteper inyaksü ta shisem.

Asür pongu rongnung khi

atema inyaker ana aser tanungba ajak ya Hanwha-i mapa nung anioker inyakerem liasü, ta company-i ashi.

Hanwha ya defence aser aerospace company ka lir. Daejeon nung parnok indang factory nung propulsion engine tulutem aser rocket propellant tem yanglur.

Ketdangsürtemi factory indang layout magizüktet, kechiyong iba ya national security temzüng ozüng kübok kümzüka lir, ta ketdangsür kati ashi.

South Korea tir Lee Jae Myung-i, iba lendong atalokba atema telangzüba agütsütsü aser bushisüngdangtsü atema takokba tashi jenjang agitsü ayongzüko, ta pa indang office sangdong ka ajanga metetdaksü.

Iran mitkari amshiba tesem nung US-i bomb pokloktsü

Dubai, Aami/June 01 (Agencies): Hopta tatemlen Iran-i America indang drone ka khazüka yokba sülen United States-i Tehran indang radar aser drones aliba tesemtem amak ta Hombarnü ashi. Iba sülen Iran-ia pari amak tenzüük ta ashi aser Kuwait nung missile aser drone aruba osang liasü.

Iran aser US tsüngta tenüng atema ceasefire aliba ya aiben tendanga makteper, aser linük anarpong nungi ketdangsür temi iba rara tembangtsü asoshi tangatetep kati arutsü meranger. Ken o ya koba tashi ka jembia aliar mejangja aser kati ka amakba ajanga jembishinü nung tetsükdaksü ajurutsü teti tebilemstü lir.

Kasa mapang Iran-i Strait of Hormuz alenbanger alima nung energy supplies nung timtem agütsür aser alima ajunga nung totzü jenjang timba akumer.

Tenüng agi ceasefire sangdonga liaka Israel aser Lebanon nung Hezbollah telungpur telok tsüngta raraba tali tesashiba kumogo. Israel-i Lebanon telungi oa amaker aser Iran bhukuma rara nung adenba Hezbollah telok yagi Israel dak drones khaloktsüba manener.

US mitkar indang Central Command ajanga ashiba agi, parnok Honibarnü Iran nung amak aser Deobarnü Geruk yimti temeket aser Qeshm Island nung amak.

"International waters nung aliba US MQ-1 drone ka khazüka yokba densema Iran-i

tashiyim mapa inyakba langzüa kanga junga asadanger amak," ta Central Command ajanga ashi.

"US fighter aircraft-i kanga kera langzüa Iranian air defenses, ground control station ka aser one-way attack drones ana raksatsü, koba regional water ajanga senzüba rong asoshi tejangja timtem liasü."

Kuwait-ia aruya aliba drone aser missile anünglak nung raksatsütsü atema Hombarnep par air defenses ajanga akha ta ashi.

Kasa mapang Iran indang paramilitary Revolutionary Guard-ia America nungeri amakba nung telangzüba agütsü ta ashi saka kong agütsüar mashi, koba Kuwait nung amakba ya ashir alitsü. Sorkar meyong IRNA news agency ajanga sangdong ka nung, Guard-i ashiba agi US sepaitemi telecommunications tower ka nung tenük yoker amak, ta ashi.

Kuwait nungya US Army Central lir, koba Army asoshi Mideast forward command lir. US Air Force-i MQ-1 Predator ya mamshir, saka US Army-i tang tashi amshir.

Iranian state television ajanga mapang tatsüka lir ballistic missile yokba video ka prokshia liasü.

Ibai US aser Iran tsüngta tensa tamajungba akumba tesüsaba alitsü. Hopta tatemlen US-i Gambia indang nisan songa aliba cargo ship indang engine room nung missile ka khaloktsü, koba US-i Iran nunger rongnendak tesem rakpoktsü

meranga liasü.

Strait ajanga rong ishika adokteta lir, kong alima nung totzü aser natural gas shilem 20 ajanga bena liasü. Iba den chemical fertilizer asoshia tebilemstü akar, aser iba yongji chiyongtsü agi anüngtsü tsübor. Alima nung ayokba chemical fertilizer shilem 30 shi Gulf region nung yanglur.

Trump-i Hokulbarnü advisers tem den ajuruteper liasü, saka ceasefire atsülanga strait tanaben lapoktsü asoshi tezüngzüktep agitsü atema telemetba ano magi. Iran-i iba tezüngzüktep ano tatem kuma merenem ta ashir.

US aser Israel nati February 28 nü Iran dak maka rara ya tenzüük. Trump-i iba rara asoshi nukjidong melenshir, saka Iran nem nuclear nok-nü meyangludaktsütsü ya ka lir.

Iran-i par nuclear program ya rara asoshi masü ta shijen ashir, saka par ket nung aliba enriched uranium ya nuclear nok-nü ishika yanglutetsüsa lir.

"Temulung melemetba tensa ka nung ken o jembishinür ta onoki tetenzük nungi meteta liasü aser maneni meteta lir," ta Baghaei-i osangbener dang ashi.

Trump-i Hombarnep pa indang Truth Social sapang nung jembishinü nung tamang akaba indang shia liasü.

"Iran-i tezüngzüktep ka kangasa aginer, aser ibai USA aser onok den alir asoshia tajung asütsü. Mener anisüngzüka liang, tatem nung ajak ajungtsü - aser teti ajunger!"

MENUNGRA BILEMTETER

Mrs. MARKALA AIER (Mopungchuket)



02.06.2025 - 02.06.2026

Tsüngremer arishi temjena tembanger tanü "küm ka ajunger", saka onok ajak asoshi pungmang ka ama anogo shia na menungra bilemteter. Na meliaka, na onok den ali ama ne mapa tajung aser sayutsüngi o tem onoki kodanga mamatsü.

- Temeim kinungbu, chirnur aser semchirtem.

PELABA LEMSATEPER



ASO: 05/05/1978

ASÜ: 27/05/2026

Onoki meima aliba kinungbu, **Wb. Moasungba. I** (Chungliyimsen) shirangba mapang nungi tenzüka alima nungi pilar onok mangyimba mapang nung kinungertem, medemertem, kiyongertem, Arago aser lokti balala nungi aikati onok dang temeim sayua nübo, sarasadem, rongsen, shisatsü aser yimya balala agi yariba ajanga onok mulung süneptsüba den onok nem tashi tasen agütsüogo.

Nenok ajak dang kangasa pelar, ajak takoksang Tsüngremi nenok kija-kibongtem tali moajang, ta sarasademtsür.

-Temeim kinüngtsü aser kinüngertem.

Myanmar: Kaung Tat yimtsüng nung nisung 39 asü

Yangon, Monupii/June 1

(Agencies): Myanmar nung telungpurtemi bendena aliba explosive tem apokba sülen nisung aika tepsetogo, ta iba yimtsüng azüoker aliba telungpur telok aser tenük kuli agütsürtemi Hombarnü ashi.

Kaung Tat yimtsüng nung iba tapoktsü oset bendena aliba tesem ya Deobarnü otongdar Lway Yay Oo-i ashiba den, ki 200 dak tema raksago, ta ashi.

Hombarnü TNLA otongdari ashiba agi, iba lendong nung nisung 39 asüba aser nisung 75 yiruba mozüki ajanga metetdaksüogo. Local media sangdong balala ajangabo iba lendong nung nisung 55 asü, ta sangdonger liasü.

"Iba tesem temeket ajak ajasa-a raksago," ta yimtsüng nung alir Moe Z-i Reuters dang ashi. Pa par medemertem den yimtsüng nungi km 2.4 shi pilar senzüa aliba mapang lendong ya atalok aser ashiba agi, iba tesem nungi mokozü tulu adoka liasü, ta shisem.

TNLA, shirnoki China den arrtsü nung iba yimtsüng

azüoka lir aser Myanmar sorkar den ceasefire nung lir, parnok Deobarnü ashiba agi, mining atema amshitsü asoshi yua aliba tapoktsü oset tem poka liasü.

"Iba tatalokba atema onoki tatok meshir, koba ajanga nisung taküm aika samaogo aser teraksatsüba tulu adokdaksüogo," ta TNLA otongdar Lway Yay Oo-i ashiba den, ki 200 dak tema raksago, ta ashi.

Linük nung civil war adoker aliba mapang rare earths mineral tem densema Myanmar nung mineral balala ya military-i nongitba sorkar aser sorkar anemba teloktem atema sen aazüktsü asoshi kanga tongtibang kümogo.

2021 küm military-i Nobel laureate Aung San Suu Kyi-i aniba civilian sorkar atsüngba sülen mepetmesü tenzüka liasü.

Otongdar Moe Z-i ashiba agi, mezüngbo parnok anüng ajanga iba tesem amaker asütsü ta bilema liasü, saka iba sülen bomb talila pokyonga maoba ajanga mepoki aliba bomb tulu ka apok asütsü ta bilema liasü.

Küm 24 asayaba sülen Milner asaya nungi anisüngzüker



Aami/June 1, 2026 (Agencies): Taoba mapang England team nungi international asayar James Milner küm 24 tashi Premier League nung asayaba sülen pa asaya nungi anisüngzüker sangdongogo.

Arishi küm 40 tain asayar ya taoba season asem tashi Brighton nungi asayaba sülen contract tembanger liasü.

Milner Premier League nung team trok nungi asayaogo, aser pa ya taküm February ita Premier League nung asaya timba nung asayaba asayar küma otsü tasen ka yanglua liasü.

Pa mezüing Leeds nungi asaya-a tenzüker aser Manchester City nungi asayaba mapang Premier League title ana aser Liverpool nungi asayaba mapang ka koka liasü. Paisa 2019 küm Liverpool-i Champions League akokba

nung teyari agüja liasü.

Milner 2009 küm Aston Villa nungi asaya aliba mapang England team nung mezüingbuba asaya aser pa linük tenüing nungi 61 ben asayaogo.

"Ni tia ka-a mamatoktetsüsa tajangshiba karajangshiogo, kong PL nungi relegate mesüi asayatsü atema toktepba aser takok marnok akokba, Europe nung asayaba aser linük tenüing nungi European Championships ana aser World Cup ana nung asayaba densema lir," ta Milner-i social media ajanga ashi.

"Ajisüaka ajak dak alia ni asayaba mapang nisung balala den asayaba aser tembar akümba ya ni teti bilemtetsü," ta paisa shisem

Milner ya arishi küm 16 asüba mapang 2002 küm November ita Leeds nungi mezüingbuba asaya. Iba mapang pa Premier League

nung asayar tanobusang rongnung tanabuba liasü.

Iba sülen taruba ita pa Premier League nung goal idaktsüba asayatem rongnung tanobusang aküm aser tang pa list nung Max Dowman aser James Vaughan sülen tasembuba jenjang nung lir.

Milner ya yiruba ajanga 2024-25 season masayatetm saka pa 2025-26 season nungbo tetoktepba ajak nung 22 ben asayaogo aser Brighton pur season nung tatembangbuba asayaba mapang pa PL nung 658buba asaya liasü.

Leeds nung küm ana asayaba sülen pa lanuwa asayaba club Newcastle pur 2004 küm Championship-i relegate asüba sülen iba club dang ayok.

Pa 2008 küm Villa nung aden aser iba sülen 2010 küm Manchester City nung dena 2012 aser 2014 küm Premier League title ana koka liasü.

2015 küm pa Liverpool-i ao aser oa club nungi season ti asaya. Iba mapang pai asaya 332 nung goal 26 idakja liasü.

Pai 2020 küm Liverpool puri 1990 küm sülen mezüingbuba league title abenba nung teyari agütsü. Pai City aser Liverpool naprong nungi FA Cup aser League Cup kokogo.

Ochoa Mexico tenüing nungi World Cup 6buba asayatsü



Aami/June 1, 2026 (Agencies): Guillermo Ochoa World Cup 6buba nung asayatsü atema Mexico squad nung züingoksemba sülen taküma iba asayamung nung asayatsü imla alitsü.

Arishi küm 40 tain goalkeeper ya Lionel Messi aser Cristiano Ronaldo na den World Cup trokbuba nung asayaba mezüingbuba asayatem akümtsü renema lir.

Messi aser Ronaldo naprongla Argentina aser Portugal squad nung züingoksema asayatsü lir, ajisüaka Ochoa bo kümtem tsüingda Mexico team nungi kangabo masayai arudar.

Ochoa mezüingbuba World Cup 2006 küm Germany nung asaya aser taoba season Cypriot club AEL Limassol nungi

Fulham striker Raul Jimenez-a Javier Aguirre-i shimba asayar 26 rongnung densema lir. Mexico team ya Edson Alvarez lenisüba nung asayatsü, shiba taoba season West Ham nungi loan nung oa Fenerbahce nungi asayaogo.

Arishi küm 17 asayar Gilberto Mora ya Mexico team nungi World Cup ka nung asayaba asayar tanobusang akümtsü lir, pa den arishi küm 23 tain Armando Gonzalez-a team nung züingoksemogo.

Coach ama Aguirre lenisüba nung Mexico team World Cup tasembuba asayatsü lir. Pai anir parnok 2002 aser 2010 küm asayaogo.

Taküm World Cup ya Mexico, US aser Canada nung asayatsü lir aser parnok tatembangbuba warm-up asaya Serbia den Brestostibarnü

asayatsü.

Mexico team World Cup nung mezüingbuba asaya South Africa den June 11 nü Mexico City, Estadio Azteca nung asayatsü. Iba sülen June 18 nü South Korea den Zapopan nung aser Czech Republic den June 24 nü Estadio Azteca nung asayatsü.

Mexico World Cup squad:

Goalkeepers: Raul Rangel (Guadalajara), Guillermo Ochoa (AEL Limassol), Carlos Acevedo (Santos Laguna).

Defenders: Jorge Sanchez (PAOK), Israel Reyes (Club America), Cesar Montes (Lokomotiv Moscow), Johan Vasquez (Genoa), Jesus Gallardo (Toluca), Mateo Chavez (AZ).

Midfielders: Erik Lira (Cruz Azul), Orbelin Pineda (AEK Athens), Alvaro Fidalgo (Real Betis), Roberto Alvarado, Brian Gutierrez, Luis Romo (Guadalajara), Edson Alvarez (West Ham), Obed Vargas (Atletico Madrid), Gilberto Mora (Tijuana), Luis Chavez (Dynamo Moscow).

Forwards: Cesar Huerta (Anderlecht), Alexis Vega (Toluca), Julian Quinones (Al-Qadsiah), Guillermo Martinez (UNAM), Armando Gonzalez (Guadalajara), Santiago Gimenez (AC Milan), Raul Jimenez (Fulham).

India nung Zee-i FIFA World Cup broadcast rights alizükogo

Aami/June 1, 2026 (Agencies): Zee Entertainment Enterprises Limited (ZEEL)-i 2026 FIFA World Cup atema Indian broadcast temeden officially alizükogo. Iba den 2034 tashi FIFA asayamungtem temedena parnoki alizükogo.

Iba tetezü United States, Mexico aser Canada nung linük 48 asayatsü aliba FIFA World Cup 2026 ya Zee indang tawa amenokba Unite8 Sports channel tem aser ZEE5 nung live sayutsü.

Iba tenanzüktepba ya tebur World Cup atema dang masü. 2026 aser 2030 FIFA World Cup den Zee nungsa 2027 FIFA Women's World Cup aser tanga tongtumbang FIFA youth aser futsal asayamungtem sayutsü.

Package nung the FIFA Men's U-17 World Cup, FIFA Women's U-17 World Cup, FIFA Men's U-20 World Cup, FIFA Women's U-20 World Cup, FIFA Futsal World Cups aser FIFA Intercontinental Cup nungger densema lir.

Tenanzüktepba ya 2034 tashi atema alizükogo aser iba ajanga tang temeden alizükba ya kümtem tsüingda Indian market nung football temeden alizükba tongtumbangtuba kümdaktsüogo.

Iba telongjem indang jembiba mapang Zee Entertainment CEO Punit Goenka-i, asaya ka ama football ya India nung renloka aotsü lenmang sadema lapoka lir,

ta ashi.

"Alima nung saisabong asayamung tulutiba ka India nungertem nem repringdaksütsü atema jangradema bilemer," ta Goenka-i ashi.

Paisa, iba partnership ajanga India nung fan tasentem adokdakja football asaya takaraba renloka aotsü asoshi teyari agütsütsü, ta ashi.

2026 FIFA World Cup June 11 nü nungi tenzüksü lia tang iba osang ya sangdongogo.

2022 Qatar World Cup ama masü taküm World Cup ya India nungertem atema asaya repringtsü asoshi mapang tamajung lir. Asayamung ya North America nung asayar asünung time-zone balala asüba ajanga India nungbo ayaterem aser aneppongi repringtsüsa akümer. Iba ajanga broadcaster temi sen aika entoka temeden alizüktsü nongnanga liasü.

2022 FIFA World Cup temeden ya India nung Viacom18-i alizük, koba tangbo JioStar kümogo. Parnoki USD million 62 shi agi iba temeden alizükba liasü.

Osang ajanga ashiba agi, FIFA-i mezüingbo Indian rights package atema USD million 100 jungnüa meshi, saka ajemshija liasü. China Media Group-i China nung iba asayamung temeden atema USD million 62 shi agütsür alitsü ta amanger.

Hetmyer & Joseph na WI ODI squad nung züingoksemogo

Aami/June 1, 2026 (Agencies): Sri Lanka den ODI asaya asem atema Cricket West Indies (CWI)-i Hombarnü asayar 15 shimba metetdaksüogo. Left-handed batter Shimron Hetmyer aser fast-bowler Alzarri Joseph nata squad-i meyipa aruogo.

Hetmyer, shiba 2027 ICC Men's ODI World Cup dak rangloker CWI tasa nung shilem ka ama ODI atema anisemogo, pa iba asayamung nung tatembangbuba asaya metenzük tsüingda squad nung adentsü. Kasa mapang nung Joseph ya yiruba ajanga 2025 küm July ita nungi masayai aruogo aser pa taoba küm Australia den tatembangbuba asayaba sülen tang mezüingbuba asayatsü lir. Spinner Gudakesh Motie shiba November ita New Zealand nungbo oa masayashi pa-a squad nung züingoksemogo.

ODI asem ya June 3, 6 aser 8 nü Kingston, Jamaica kübok Sabina Park nung asayatsü, koba 2027 World Cup atema automatic qualification asoshi West Indies atema kanga tongtumbang asütsü.

Captain Shai Hope lenisüba nung team asayatsü, aser parnok

Kidang ODI asayamung pongu tashi khen danga tamakok mongui asaya aruba maneni atsülangtsü merangtsü. Parnok tatamsa kidang 2025 küm August ita Pakistan den asaya-a takok nguogo.

Head Coach Daren Sammy-i ashiba agi, WI team tawa kidang tamakok mongui asayaba ajanga asayatem parnok sasa dak tali temulung lema kümdaktsütsü.

"Sri Lanka team ya ODI team tajung ka lir, talisa atasa asayatsüba aser kanga sangra asayatsüba condition tem nung parnoki kanga junga asayar. Onoki kecha tetsübu makai intelligent cricket asayaner," ta pai ashi.

Linük ana tsüingda ODI asayaba sülen Jamaica nung T20I asem asayatsü aser iba sülen Antigua nung Test ana asayatsü.

West Indies ODI squad: Shai Hope (c/wk), Akeem Auguste, John Campbell, Keacy Carty, Roston Chase, Matthew Forde, Justin Greaves, Shimron Hetmyer, Amir Jangoo, Alzarri Joseph, Shamar Joseph, Gudakesh Motie, Sherfane Rutherford, Jayden Seales, Shamar Springer.

BILEMDANGANG

"Timla melira nisung ka tejakleni aotsü tasak kümdaktsür."